

МЕСЯЦА ИУЛИЯ В 11-Й ДЕНЬ

ПРЕСТАВЛЕНИЕ СВЯТЫЯ БЛАЖЕННЫЯ И РАВНОАПОСТОЛЬНЫЯ ОЛЬГИ, КНЯГИНИ
РОССИЙСКИЯ, ВО СВЯТОМ КРЕЩЕНИИ НАРЕЧЕННЫЯ ЕЛЕНА

НА ВЕЛИЦЕЙ ВЕЧЕРНИ

На Господи, возвах: стихиры на 8, глас 4:

Подобен: Яко добля:

Яко солнце, возсия нам * преславная память твоя, Ольго Богомудрая, * мати князей Российских, * Христова мизиница, * апостольским учением воспитана, * возмогла еси на кумиры, * паче же на диавола, * силою Святаго Духа просвещаема, * от тьмы неразумия всю страну * и люди к Богу привела еси, * Егоже моли о творящих твою память. [Дважды.]

В разуме духовном, * имже посрамила еси врага, прельстившаго Еву, * и сего оружие сломила еси, * богосажденный рай церковный создала еси, * в немже древо животное, Крест, водрузила еси, * и трапезу Божия брашна имущи, * источник неисчерпаемый крове Христовы, * егоже пивши, нетленна пребываеши, * за вся ны молящися присно. [Дважды.]

Духовно возвеселитесь, россиястии концы, * память чтуще Ольги Богомудрая: * молится бо выну ко Христу * с чудотворцами и мучениками, * помощницу имущи Святую Богородицу, * избавитися от бед и печалей * верою поющим ю * и кланяющимся раце нетленного ея тела. [Дважды.]

Приидите, христоименитии людие россиястии, * возвеличим во хвалениих праматерь нашу, * велию мудрость и мужество показавшую, * славу мира презревшую * и Христа Бога истиннаго паче всех возлюбившую, * и тако к ней воззовем: * о преславная угоднице Христова, * моли о людех российских, * да ни коими козньми вражиими от правыя веры отвратятся * и в благочестии непоколебими да пребудут. [Дважды.]

Слава, глас 6:

Приидите, роди россиястии, * песньми восхвалим Ольгу премудрую, * приидите, разумом богатыиися, * разум свой в послушание веры * приводити от нея научитесь, * приидите, мужие, честь жене преславней воздайте, * приидите, жены, мужеству ея великому подражайте, * приидите, владычии, и уразумейте * вся земная превосходящую славу нетленную, * приидите, вси внуцы ея, * и в день ея светло восторжествуйте, * молится бо тепле ко Господу, * еже просветити души наша.

И ныне, Богородичен:

Кто Тебе не ублажит, Пресвятая Дево; * кто ли не воспоет Твоего Пречистаго Рождества; * безлетно бо от Отца Возсиявый Сын Единородный, * Тойже от Тебе, Чистыя, пройде, * неизреченно воплощся: * естеством Бог сый, * и естеством быв Человек нас ради, * не во двою лицу Разделяемый, * но во Двою Естеству * неслитно Познаваемый. * Того моли, Чистая, Всеблаженная, * помиловатися душам нашим.

Вход. Прокимен дне и чтения три.

Судий Израилевых чтение (главы 4; 5, 1–12):

И приложиша сынове израилевы сотворити злое пред Господем, и Аод умре. И отдаде их Господь в руку Иавина, царя Ханаанска, иже царствова во Асоре. И воевода силы его Сисара, и той живяше во Арисофе языков. И возопиша сынове израилевы ко Господу, яко девять сот колесниц железных бяше ему и той озлоби Израиля зело лет двадесять. И Деввора, жена пророчица, жена Лафидофова, сия судяше Израилю в то время и сия живяше под фиником Деввора между Рамою и между Вефилем, в горе Ефремли, и восхождаху сынове израилевы к ней тамо на суд. И посла Деввора и призва Варака, сына Авинеемля, из Кедеса Неффалимова и рече к нему: не заповеда ли тебе Господь, Бог Израилев, и пойдеши в гору Фавор и поймешши с собою десять тысяч мужей от сынов Неффалимских и от сынов Завулонских, и приведу к тебе в водотечь Кисонь Сисару, воеводу силы Иавини, и колесницы его, и множество вой его и предам его в руки твои. И рече к ней Варак: аще пойдеши со мною, пойду, и аще не пойдеши со мною, не пойду, яко, не вем дне, в оньже благоустроит Господь Ангела со мною. И рече Деввора к нему: идущи пойду с тобою, обаче веждь, яко не будет тебе слава на пути, в оньже ты идеши, понеже в руку женску предаст Господь Сисару. И воста Деввора и пойде с Вараком до Кадиса. И возва Варак Завулону и Неффалима до Кадиса, и поидоша вслед его десять тысяч мужей, и иде с ним Деввора. И Хавер Киней отлучися от Кены и от сынов Иовава, ужика Моисеова, и потче кущу свою под дубом почивающих, иже есть при Кедесе. И возвестиша Сисаре, яко взыде Варак, сын Авинеемль, на гору Фавор. И созва Сисара вся колесницы своя, девять сот колесниц железных, и вся люди, иже с ним, от Арисофа языков в водотечь Кисонь. И рече Деввора к Вараку: востани, яко сей день, в оньже предаде Господь Сисару в руку твою, зане Господь изыдет пред тобою. И сниде Варак с горы Фавор и десять тысяч мужей вслед его. И сотре Господь Сисару и вся колесницы его и весь полк его острием меча пред Вараком. И сниде Сисара с колесницы своя и побеже ногами своими. И Варак гоняй вслед колесниц его и вслед полка, даже до дубравы языков. И паде весь полк Сисарин острием меча, не остана ни един. И Сисара убеже ногами своими в кущу Иаили, жены Хавера Кинеева, яко мир бяше между Иавином, царем Асорским, и между домом Хавера Кинеева. И изыде Иаиль во сретение Сисаре и рече к нему: уклонися, господине мой, уклонися ко мне, не бойся. И уклонися к ней в кущу, и покры его одеждею своею. И рече Сисара к ней: напой мя мало воды, яко возжаждах. И отреша мех млечный, и напой его, и покры его. И рече к ней Сисара: стани во дверех кущи, и будет, аще кто приидет к тебе, и вопросит тя, и речет: есть ли зде муж? и речеши: несть. И взя Иаиль, жена Хаверова, кол кущный, и взя млат в руку свою, и вниде к нему тихо, и водрузи кол во скрании⁴⁷ его, и пронзе до земли, и сей, утрудся, спаше и издше. И се Варак, гоняй Сисару. И изыде Иаиль во сретение ему и рече ему: прииди, и покажу тебе мужа, егоже ты ищещи. И вниде к ней, и се Сисара лежаше мертв и кол во скрании его. И покори Господь Бог в той день Иавина, цари Ханааня, пред сыны израиловыми, и хождаше рука сынов израиловых, ходящи, и ожесточися на Иавина, цари Ханаанска, дондеже истребиша его. И воспе Деввора и Варак, сын Авинеемов, в той день и рече: внегда начати вождом во Израили, в произволении людей, благословите Господа. Услышите, царие, и внушите, князи: аз Господеву воспую и пою Богу Израилеву: Господи, во исходе Твоем от Сира, внегда воздвизатися Тебе от села Едомова, земли потрясется, и небо возмутися, и облацы искапаша воду. Горы подвигошася от лица Господа Елои, тая Сина⁴⁸ от лица Господа, Бога Израилева. Во дни Самегара, сына Анафова, во дни

Иаили, оскудеша путие, и идоша в пути кривы, и идоша в пути развращенны. Оскудеша живущии во Израили, оскудеша, дондеже воста Деввора, дондеже воста мати во Израили, избраша боги новы, яко хлеб ячен⁴⁹, тогда воеваша грады князей, щит не явися, ниже копие в четьредесяти тысящах во Израили. Сердце мое на учиненная во Израили, сильнии людий, благословите Господа. Ездящии на ослитех белых в полудне, и седащии на судищи, и ходищии на пути сонмов, провещайте. Глас плещущих посреде веселящихся: тамо дадит правду. Господи, правды укрепи во Израили: тогда разыдошася во грады свой людие Господни. Востани, востани, Деввора; востани, востани, глаголи с песнию; востани, Вараче, и плени плен твой, сыне Авинеемль.

Иудифи чтение (глава 13, 2–20):

Остася же Иудиф едина в шатре и Олоферн повержен на ложи своем, бяше бо преисполнен вином. И рече Иудиф рабе своей, да стоит вне ложницы ея и да смотрит исхода ея, якоже по всяк день, рече бо, яко изыти имать на молитву свою и Вагою глагола по словесем сим. И отыдоша вси от лица ея, и ни един остася в ложнице, от мала даже до велика. И ставши Иудиф при одре его, рече в сердца своем: Господи Боже всея силы, призри в час сей на дела рук моих ко возвышению Иерусалима, яко ныне время помоществовати наследию Твоему и совершити начинание мое ко сокрушению врагов, иже восташа на нас. И приступивши к столпнику одра, иже бяше у главы Олоферновы, снят меч его с него, и, приближившиися ко одру, взя в горсть власы главы его, и рече: укрепи мя, Господи Боже Израилев, в день сей. И удари в выю его дважды силою своею, и отгя главу его от него, и отвали тело его от постели, и отгя завесу от столпов, и по мале изыде, и предаде рабыни своей главу Олофернову. И вложи ю в мешец снедей своих, и изыдoste обе купно по обычаю своему на молитву, и, прошедше полк, обыдoste дебрь оную, и въздoste на гору Ветилуи, и приидoste ко вратом ея. И рече Иудиф издалеча стерегуцим на вратех: отверзите ныне, отверзите врата, с нами Бог, Бог наш, сотворити еще крепость во Израили и силу на враги, якоже и днесь сотвори. И бысть, яко услышаша мужие града того глас ея, потщашася снити ко вратом града своего и созваша старцев града. И стекошася вси от мала даже до велика, яко паче чаяния бе им, еже приити ей, и отверзоша врата, и восприяша их, и, вжегше огонь во свещение, окружиша их. Она же рече к ним гласом великим: хвалите Бога, хвалите, хвалите Бога, Иже не остави милости Своя от дому Израилева, но сокруши враги наша рукою моею в ночь сию. И, изъемши главу из мешца, показа, и рече им: се глава Олоферна, вождона начальника силы Ассурския, и се завеса, за неюже лежаше во пиянствах своих, и порази его Господь рукою женскою. И жив есть Господь, иже сохрани мя в пути моем, имже ходих, яко прельсти его лице мое в пагубу его, и не сотвори греха со мною во осквернение и срамоту. И ужасошася вси людие зело, и, падше, поклонишася Богу, и реша единодушно: благословен еси, Боже наш, уничтоживый в день сей враги людий Твоих. И рече ей Озия: благословена ты еси, дщи, Богом Вышним паче всех жен, яже на земли, и благословен Господь Бог, Иже созда небеса и землю, Иже управи тя на сокрушение главы князя врагов наших. Яко не останет надежда твоя от сердца человек, поминающих крепость Божию, даже до века, и да сотворит тебе сия Бог в возношение вечное, еже посещати тя во благих, за еже не пощадела еси души твоя смирения ради рода нашего, но пособствовала еси падению нашему, в правоте ходивши пред Богом нашим. И реша вси людие: буди, буди.

Притчей чтение (глава 31, 10–13):

Жену доблю кто обрящет дражайши есть камня многоценнаго таковая. Дерзает на ню сердце мужа ея, таковая добрых корыстей не лишится, делает бо мужу своему благая во все житие, обретши волну и лен, сотвори благопотребное руками своима.

На литии стихиры, глас 1:

Днесь созывается к веселию вся Российская земля, * наста бо память праматере нашея, * ко свету Христовы веры нас приведшия, * и путь спасения нам показавшия, * и благостроению державы нашея начало положившия.

Слава, глас 6:

Днесь да торжествуем, братие, * и да празднуем память святяя Ольги, * не песньми токмо праматерь нашу славяще, * но и дела христианскими славу Господеви воздающе, * отринем прочее языческое нрава нашего * и нечестивое жития нашего отвержем, * да не до конца прогневается Человеколюбец Господь * грех ради наших.

И ныне, Богородичен, глас 6:

Творец и Избавитель мой, Пречистая, * Христос Господь, * из Твоих ложесн прошед, * в мя Оболкийся, * первыя клятвы Адама свободи. * Темже Ти, Всечистая, * яко Божии Матери же и Деве воистинну, * вопием немолчно: * радуйся Ангельски, * радуйся, Владычице, * Предстательство и Покрове * и Спасение душ наших.

На стиховне стихиры, глас 8.

Подобен: О, преславнаго чудесе:

О, преславнаго чудесе! * женою падший род человеческий * Женою возставляет пречудно Человеколюбец Господь * и в последняя лета жену посылает * на обращение рода российскаго, * Ольгу преславную, * еяже Крещением * начало полагает просвещению страны Российския * во спасение душ наших.

Стих: Близ Господь всем, призывающим Его, * всем, призывающим Его во истине.

Радуйся, граде богоспасаемый Киеве, * всем концем земли нашея * свет Христов источивый * и первую угодницу в ней показавый, * Ольгу пречестную, * радуйся, Вышеграде, наследие ея честное, * радуйся, жен российских сословие, * похвалу нашу давшее * во спасение душ наших.

Стих: Волю боящихся Его сотворит, * и молитву их услышит, и спасет я.

Возвеселися, неплодная Российская земле, * ликуй, нечревоболевшая: * ныне раждаеши чадо твое – * Елену блаженную, * та же призовет ко Господу отца нашего Василия * и подражати себе приведет лики угодников Его, * подвиги своими прославити имущих * грады и дебри твоя, * во спасение душ наших.

Слава, глас тойже:

Велия слава твоя, и память твоя с похвалами, * Ольго премудрая, * тщету идолов презревши * и истину Евангельскую уразумевши, * в седилах ум твой Христу * в послушание пленила еси * и всем родом российским * путь истинный живота показала еси, * моли о нас Единого Человеколюбца.

И ныне, Богородичен.

Безвестная Дево, * Яже Бога неизреченно зачещи плотию, * Мати Бога Вышняго, * Твоих рабов мольбы приими, Всенепорочная, * всем подающа очищение прегрешений: * ныне наша моления приемлющи, * моли спастися всем нам.

Тропарь, глас 1:

Крилами богоразумия вперивши твой ум, * возлетела еси превыше видимыя твари, * взыскавши Бога и Творца всяческих, * и, Того обретши, паки рождение Крещением прияла еси, * древа животного наслаждающися, нетленна во веки пребываеши, * Ольго приснославная.

Ин тропарь, глас 8:

В тебе, Богомудрая Елено, известен спасения образ бысть в Русстей стране, * яко, приемши баню святаго Крещения, последовала еси Христу, * творящи же и учащи, еже оставити идольскуто прелесть, * восприяти же попечение о души, вещи безсмертней, * темже и со Ангелы радуется, равноапостольная, дух твой.

Ин тропарь, глас 4:

Оставивши лествидольскую, * последовала еси Христу, Безсмертному Жениху, Ольго Богомудрая, * в Егоже чертозе радующися, * непрестанно молися * о чтущих верою и любовию святую память твою.

Ин тропарь, еллинский, глас 3:

Святая равноапостольная избраннице Христова, княгине Ольго, * народ твой словесным и чистым Христовым млеко напоившая, * молися Милостивому Богу, * да прегрешений оставление * подаст душам нашим.

Слава, и ныне, Богородичен.

НА УТРЕНИ

На Бог Господь: тропарь Ольги, глас 1:

Крилами богоразумия вперивши твой ум, * возлетела еси превыше видимыя твари, * взыскавши Бога и Творца всяческих, * и, Того обретши, паки рождение Крещением прияла еси, * древа животного наслаждающихся, нетленна во веки пребываеши, * Ольго приснославная.

Слава, ин тропарь, глас 8:

В тебе, Богомудрая Елено, известен спасения образ бысть в Русстей стране, * яко, приимши баню святаго Крещения, последовала еси Христу, * творящи же и учащи, еже оставити идольскуто прелесть, * восприяти же попечение о души, вещи безсмертней, * темже и со Ангелы радуется, равноапостольная, дух твой.

И ныне, Богородичен глас 8:

Иже нас ради Рождейся от Девы, * и распятие претерпев, Благий, * испровергий смертию смерть, и Воскресение явлей, яко Бог, * не презри, яже создал еси рукою Твоею, * яви человеколюбие Твое, Милостиве, * приими Рождшую Тя Богородицу, молящуюся за ны, * и спаси, Спасе наш, люди отчаянныя.

По 1-м стихословии седален, глас 3:

Воистинну в женах мудрейшею показалася еси, Ольго славная, * леств языческую отвергши, и во Христа веровавши, * и Владимира к тому подвигши; * не забуди убо, яко прамати, нас, недостойных чад твоих, * и утверди в правоверии и благочестии * богоугодными твоими молитвами.

Слава, и ныне, Богородичен:

Злобою ожестевшая сердца наша умягчи, Дево Пречистая, * печали наша утоли, * яко многи скорби у Креста Сына Твоего претерпевшая, * и прошения наша услыши, яко Благая Скоропослушница.

По 2-м стихословии седален, глас 4:

От Господа стопы человеку исправляются; * тем и тебе, святая Ольго, направи * сердца Испытуяй и утробы к Царствию Небесному, * егоже да не лишит и нас молитвами твоими.

Слава, и ныне, Богородичен:

Упование христиан непостыдное * и стено необоримая, Владычице Богородице, * не отрини молений к Тебе прибегающих, * но, яко Благая, заступи и помилуй нас.

Величание:

Величаем тя, * блаженная и равноапостольная княгине Ольго, * и чтим святую память твою, * идолы поправшую * и многия люди российский святым Крещением просветившую.

Ино величание:

Величаем тя, * святая равноапостольная княгине Ольго, * яко зарю утреннюю в земли нашей возсиявшую * и свет веры Православныя * народу своему предвозвестившую.

Псалом избранный: Блажен муж: зри Ирмологий, 29 августа.

По полиелеи седален, глас 5:

Достойно равноапостольныя царицы именем наречена еси, блаженная, * оной

бо, Крест Христов прилежно взыскавшей, подражала еси, * Христа Бога истиннаго взыскавши и Крест Того на себе возложши, * Егоже моли иго благое Креста понести и нам, грехи обремененным, * и упование Небесное улучшить.

Слава, и ныне, Богородичен:

Отныне ублажат Мя вси роди,— рекла еси, Пречистая Дево, * от праведныя Елисавет целование приемши; * тем убо и мы от отец наших, * яко Богородицу и Матерь Света, * Тя пети научихомся.

Степенна, 1-й антифон 4-го гласа.

Прокимен, глас 4: Во всю землю изыде вестие их * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Всякое дыхание:

Евангелие от Матфея, зачало 104.

Рече Господь притчу сию: уподобися Царствие Небесное десятиим девам, яже прияша светильники своя и изыдоша в сретение жениху, пять же бе от них мудры и пять юродивы. Юродивыя же, приемши светильники своя, не взяша с собою елеа, мудрыя же прияша елей в сосудех со светильники своими, коснящу же жениху, воздремашася вся и спашу. Полунощи же вопль бысть: се жених грядет, исходите в сретение его. Тогда восташа вся девы тыя и украсиша светильники своя. Юродивыя же мудрым реша: дадите нам от елеа вашего, яко светилници наши угасают. Отвещаша же мудрыя, глаголющя: еда како не достанет нам и вам, идите же паче к продающим и купите себе. Идущим же им купити, прииде жених, и готовыя внидоша с ним на браки, и затворены быша двери. Последи же приидоша и прочыя девы, глаголющя: Господи, Господи, отверзи нам. Он же отвещав рече им: аминь глаголю вам, не вем вас. Бдите убо, яко не весте дне ни часа, в оньже Сын Человеческий приидет.

По 50-м псалме стихира, глас 6:

Провозвестницу веры * и ко спасению путеводительницу Богоизбранную, * Ольгу премудрую восхвалим * и песньми почтим святую память ея, * молится бо со всеми святыми земли нашея * о спасении душ наших.

Канон Богородицы: Многими содержимъ напастьми: на 6 и канон святых равноапостольных Ольги, на 8, глас 5.

Песнь 1

Ирмос: Величаваго фараона в мори потопивша * со оружием и всадники, * Израиля же преславно спасша и по суху проведша, * поем Христа, яко прославися.

Величие наше и похвала ты еси, Ольго Богомудрая: тобою бо от идольския лести свободихомся. Ныне молися за род и роды, ихже Богу привела еси, поющи Христа, яко прославися.

Величаваго диавола из России прогнала еси, нечестивыя кумиры отнюд сокрушивши, вся люди от беззакония свободила еси, мудростию научающи пети Христа, яко прославися.

Черность греховную банею Крещения отнюд отмыла еси, Христа возлюбила еси, Емуже предстоящи, молися за рабы твоя, верно славящия тя.

Богородичен: Исаия Тя жезл нарицает, Пречистая, Давид же Тя – престол Господень, Аввакум – приосененную гору, кушину же Тя – Моисей, мы же Тя Матерь Божию нарицаем.

Катавасия: Отверзу уста мои:

Песнь 3

Ирмос: Державною рукою и сильным словом * Небо и землю сотворил еси, * юже Твоею Кровию искупил еси, Церковь Твою, * яже о Тебе утверждается, зовущи: * яко несть свят, разве Тебе, Господи.

Державною рукою, и мудрыми словесы, и сильным словом учила еси твоего сына закону Христову и людем возбранила еси жрети идолом, Ольго преславная, в память твою ныне сошедшея, тебе прославляем.

Ты, яко пчела, добру разуму далече цветущия Христовы веры взыскала еси и, яко породный мед, Крещение в Царствующем граде обретши, твоему граду и людем даровала еси, егоже вси насыщени горести греха отбегают.

Весь похвальный глас и мольбу ти, Ольго, приносим, тобою бо Бога познахом, Емуже ныне предстоиши, проси мира отечеству, и на поганья победы, и душам нашим оставления грехов, поющим тя, присноблаженная.

Богородичен: Приятелище явилася еси, Дево, Неприступнаго Бога, тем Тя поют непрестанно ангельстии чини, повинующеся Владыце, Ты бо родила еси Слово Отчее, Собезначальное, без отца: о, чудо! Святый бо Дух осени Тя.

Ин кондак, глас 4:

Явился днесь благодать всех Бога, * прославльши в Руси Ольгу Богомудрую, * молитвами ея, Господи, * людем подаждь * грехов оставление.

Ин икос: Русскому языку, Псковстей стране, * богоизбранному от варяг княжескому племени прамати наречеса, Ольго, * и ходящих прежде во тьме неразумия всех честным озари крестом, * паче нас святым Крещением, * имже омывше идольскую скверну, мизиннии Богу нарекохомся людие, * к Нему за вся ны яко с дерзновением молишися, * людем подаждь грехов оставление.

Седален, глас 3:

Подвиг твой чтим, блаженная, * дивна бо крепость духа твоего, в немощи телесе явльшаяся; * языческую лесь презревши, * дерзновенно веру проповедала еси Христову, * образ нам подающи ревности о Господе.

Слава, и ныне, Богородичен:

Иже неизреченно от чистых кровей Твоих Воплотивыйся * престол уготова во чреве Твоем, Пречистая Отроковице, * Юже вси роди, яко Богородицу, достойно славят.

Песнь 4

Ирмос: Духом Божиим очищся пророк, * дышающим в нем, Аввакум Божественный, бояся, глаголаше: * внегда приблизатся лета, познан будеши, Боже, * на спасение человеков.

Дух Божий почи на тебе, яко на Девворе пророчице древле, Имже просветившися, укрепляюще Владимира разумнаго, Сисару диавола низложила еси в сети его Крещением, яко и Вараком в потоце Киссове прежде.

Быстрине подобящися, Ольго Богомудрая, сокрушенным сердцем ста, молящися к Богу, избавила еси род твоих людей от оскорбления кумирскаго и от пленения вражия свободила еси, Христа призывающе на помощь нашу.

В нарочитый день святаго твоего преставления радостно празднуем, песнь молебную Христу возсылающе, нетленным венцем венчавшему тя, Ольго Богомудрая: проси нам оставление грехов, славящим тя верно.

Богородичен: Тя, от корене Иессеева процветшую, Исаия якоже прорече, Христа – Цвет прозябшую, и Первоначальнаго плотию носившую, и Жезл Божия Духа, хвалим Тя, яко Божию Матерь и Чистую Деву.

Песнь 5

Ирмос: Слово Божие Всесильное, * мир всему миру послѣ * и светом истинным освещая и просвещая вся, * из нощи Тя славящия.

Яко голубица целомудренная, на финикс добродетелей возшла еси, криле священне посребренне имущи, имиже возлетевши, в райстей пищи возгнездилася еси, славная Ольго.

О тебе пояше Соломон прежде: вне винограда царская маслина процвете; ты бо святой грезнѣ Крещением в России насадила еси, творящи плод покаяния, о немже Сам Христос веселится.

Умилосердися, Владыко, на новопросвещенныя люди Твоя, не предаждь нас в руки поганых за множество беззаконий наших, но молитвами наставницы нашея Ольги избави ны от всякия напасти.

Богородичен: Кропите вси, якоже пишется, облацы веселия, земным: Божий бо Детищ Христос, очищай мир от грехов, воплотися от Девы и дан бысть нам.

Песнь 6

Ирмос: В Церковь Небесную Святую Твою * да придет молитва моя, * вопию Ти, яко Иона, * из глубины сердца морскаго: * от грех моих возведи мя, * молюся Тебе, Господи.

Ревность Святаго Духа в сердца приемши, отеческое зловерие возненавидела еси, и, Христа истиннаго Бога взыскавши, чадо света явилася еси, и с первенцы святых на Небесех ликуеши.

Новая ученица Христова в России явилася еси, обходящи грады и села, кумиры сокрушающе и люди учащи единому Богу поклоняться, Егоже моли за поющия тя.,

О Богоблаженная Ольго, помолися за твоя чада к Богу: мир неподвижимый отечеству нашему испроси и нам отпущение грехов, присно тя прославляющим.

Богородичен: Познавше Тобою неописанное Слово Божие, Сына Единороднаго Вседержителя, вопием Ти, земнии: радуйся, благословенная Богородице, упование душ наших.

Кондак Ольги глас 4.

Подобен: Явился еси днесь:

Воспоем днесь Благодетеля всех Бога, * прославльшаго в России Ольгу Богомудрую, * да молитвами ея * подаст душам нашим * грехов оставление.

Икос: Христиан житие видящи и непотребство языческое уразумеваючи, * сице в себе рекла еси, Ольго Богомудрая: * о, бездна премудрости и благости всех Творца! * Како утаился еси от мене доселе? * Како возмогу идолы отныне чтити? * Никтоже бо, сладкаго вкусив, восхощет горькаго, * сего ради, аще и в старости, призиви мя, Святая Троице, * и подаждь ми грехов оставление.

Песнь 7

Ирмос: Пламень пещный поработиша благочестивии отроцы, * тем свыше ороси я, готовы палимы по естеству, * но паче естества мужески пояху: * благословен еси, Господи, на Престоле Славы Царствия Твоего.

Подобно Иудифи сотворила еси, посреде кумирских телищ вшедши, тех начальника сокрушила еси и демоночетцы посрамила еси, вся же люди научила еси в чистоте вопити Христу: благословен еси, Господи, на Престоле Славы Царствия Твоего.

Похвальными цветы, аки царский венец, богомудрей твоей главе в память твою приносим, юже Христос нетлением венча, Ольго досточудная, молися за твое стадо, избавитися от всякаго зла вопиющим: благословен еси, Господи, на Престоле Славы Царствия Твоего.

Ливанскую ли гору наречем тя? На тя бо роса Небесная сниде. Или Фисон реку, добрейший сапфир, камень честный, Владимира имущую, имже просветися Российская земля? Но молитесь за ны, взывающе: благословен еси, Господи, на Престоле Славы Царствия Твоего.

Богородичен: Кивот позлащен Тя Духом именуем, спасшую мир от потопа разумнаго, Дево, спаси нас, на Тя бо надеемся и к Тебе прибегаем, отчаянныя в пучине от грех и напастей избави, вопиющия: благословен еси, Господи, на Престоле Славы Царствия Твоего.

Песнь 8

Ирмос: Крепщии отроцы трие суще, * силою оболкшеся Святыя Троицы, * уловиша и победиша халдеи, * и дивно изменися естество: * како огонь в росу прелагашеся? * Без туги я сохрани, яко пеленами, * о пролиявый мудрость на всех делех Твоих Боже, * Тя превозносим во веки.

Крепка, яко львица, силою Святаго Духа оболчена, едина устремися всюду истерзати кумиры, и дивно на Небеси и на земли: како жена прежде Бога познавает, еуже исперва всему роду падение бысть? Тою же ныне спасени, поем: о пролиявый мудрость на всех делех Твоих Боже, Тя превозносим во веки.

Премудрость Божия прежде о тебе написала есть: се еси добрая моя и прекрасная, и порока несть в тебе. Блеск лица твоего, яко мира обоняние, назнаменоваше твое, Ольго, крещение, еже посреде кумирския лести на тебе обоня Христос и всех нас от смрада демонскаго к покаянию милостию Своею, привел есть.

Помяни мене, госпоже Ольго, убогаго твоего раба, окраденнаго от врага и согрешившаго паче человек, и помолися Христу подати ми прощение о всех согрешениях, яже нечувственно содеях, окаянный, да покаянием вопию: о пролиявый мудрость на всех делех Твоих Боже, Тя превозносим во веки.

Богородичен: Не презри, Дево, Твоих раб мольбы, о Тебе бо хвалимся, Твое малое стадо мы есмы, потщися в заступление наше и изми ны от враг наших, ущедрн знающия Тя Матерь Божию и Сыну Твоему вопиющия: о проливый мудрость на всех делех Твоих Боже, Тя превозносим во веки.

Песнь 9

Ирмос: Из Едема изыде род наш * прабабы ради Евы, * призван же Тобою, рождшею нам новаго Адама–Христа, * во двою естеству, Дево Чистая. * Взыгрися Адам прадед, яко избыв первыя клятвы, * мы же Тобою хвалящися, * яко Тебе ради Бога познахом, * и Тебе величаем.

Веселися, Ево прародительнице, иже бо, ты прельстив, из Едема изведе, ныне же поправан еси твоим исчадием. Се бо Ольга животное древо, Крест Христов, в России водрузи, имже всем верным рай отверзся, мы же хвалящися, яко той ради Бога познахом, со Владимиром сию величаем.

Жену по естеству нарицаем ты, но паче силы женския подвиглася еси Тьмы твоего злата истоцила еси, да Христов закон и учителя приобрящеш, имже просветила еси землю Российскую, мы же тобою хвалящися, яко тебе ради Бога познахом, с мученики ты величаем.

Закона наставнице чистая и учительнице веры Христовы, прими похвалу от раб недостойных и молитву о нас сотвори к Богу, честно творящих твою память, да от напастей, и бед, и печалей, и лютых грехов свободимся, еще же и мук, ждущих нас, избави, молимся ти, тебе непрестанно величающии.

Богородичен: Се Церковь, се дверь, се Божия гора святая, се жезл и сосуд злат, се источник печатан, се рай святой новаго Адама, се престол страшный, се Мати Божия Пречистая, Заступница всех нас, поющих Ю.

Светилен:

Светом благодати Божией просвещенная, * светильник веры истинныя во отечествии своем возгла еси, Ольго Богомудрая, * и образ подала еси отцу нашему Владимиру, * имже и мы от тьмы неведения к Свету Христову приведохомся.

Слава, и ныне, Богородичен:

Во тьме беззаконий сущии и нечистою греховною оскверненнии, * Тя Путеводительницу к Свету невечернему имамы; * тем и мою окаянную душу к Небесней чистоте возведи * всеильным предстательством Твоим, Дево Пречистая.

На хвалитех стихиры, глас 3:

Восхвалим, о братие, * Спаса нашего и Господа * за превеликая благодеяния Его: * Той бо, Человеколюбец сый, * в сердце праматере нашея Ольги * вложи огонь любви Божественныя * и по ней в земли нашей яви сеянныя Свои плоды пребогатыя: * в князех наших – к Царствию Горнему вожди неслестныя, * во архиереех – наставники мудрыя ко спасению * и во всяком лице преподобных – столпы веры и благочестия, * ихже молитвами спасает от смерти души наша.
[Дважды.]

Воспойте Господеву песнь нову, * дубравы и доли земли Российской, * в память наставницы нашея, * и воскликните Богу гласом радования, * горы и холми, идольскими жертвами древле осквернившиися * и погибели отец наших

служившии, * ныне же рососою благодати Творца Своего окропившиися, * и Крестом Сына Его осененнии, * и споклоншиися с нами Спасающему души наша.

По грехом нашим умножишася в нас безумнии, * иже не токмо глаголют в сердцах своих – несть Бог, * но и проповедуют нам учения погибельная и развращенная, * малодушныя от Святыя Церкви отторгающая, * обаче от сих, молитвами блаженныя Ольги, * да спасет Господь души наша.

Слава, глас 8:

О мати наша возлюбленная, * рцы нам, како благодатию Вышняго * вся козни вражия препобедила еси, * да и мы, тобою наученнии, * искусни явимся спасати души наша.

И ныне, Богородичен:

Богородице, Мати Безневестная, * Ты нам прибежище и сила, * Ты еси упование наше и стена нерушимая, * не отверзи нас от Твоего лица, * но моли Сына Твоего и Бога нашего, * да спасет Тобою души наша.

Славословие великое.

НА ЛИТУРГИИ

Блаженны от канона святых, песни 3-я и 6-я.

Державною рукою, и мудрыми словесы, и сильным словом учила еси твоего сына закону Христову и людем возбранила еси жрети идолом, Ольго преславная, в память твою ныне сошедшая, тебе прославляем. [Дважды.]

Ты, яко пчела, добру разуму далече цветущия Христовы веры взыскала еси и, яко породный мед, Крещение в Царствующем граде обретши, твоему граду и людем даровала еси, егоже вси насыщени горести греха отбегают.

Весь похвальный глас и мольбу ти, Ольго, приносим, тобою бо Бога познахом, Емуже ныне предстоиши, проси мира отечеству, и на поганья победы, и душам нашим оставления грехов, поющим тя, присноблаженная.

Ревность Святаго Духа в сердца приемши, отеческое зловерие возненавидела еси, и, Христа истиннаго Бога взыскавши, чадо света явилася еси, и с первенцы святых на Небесех ликуеши.

Новая ученица Христова в России явилася еси, обходящи грады и села, кумиры сокрушающи и люди учащи единому Богу поклоняться, Егоже моли за поющия тя,

Слава: О Богоблаженная Ольго, помолися за твоя чада к Богу: мир неподвижный отечеству нашему испроси и нам отпущение грехов, присно ты прославляющим.

И ныне: Богородичен: Познавше Тобою неописанное Слово Божие, Сына Единороднаго Вседержителя, воишем Ти, земнии: радуйся, благословенная Богородице, упование душ наших.

Тропарь, глас 1:

Крилами богоразумия вперивши твой ум, * возлетела еси превыше видимыя твари, * взыскавши Бога и Творца всяческих, * и, Того обретши, паки рождение Крещением прияла еси, * древа животного наслаждающихся, нетленна во веки пребываеши, * Ольго приснославная.

Ин тропарь, глас 8:

В тебе, Богомудрая Елено, известен спасения образ бысть в Русстей стране, * яко, приемши баню святаго Крещения, последовала еси Христу, * творящи же и учащи, еже оставити идольскуто прелесть, * восприяти же попечение о души, вещи безсмертней, * темже и со Ангелы радуется, равноапостольная, дух твой.

Ин тропарь, глас 4:

Оставивши лесь идольскую, * последовала еси Христу, Безсмертному Жениху, Ольго Богомудрая, * в Егоже чертозе радующися, * непрестанно молися * о чтущих верою и любовию святую память твою.

Ин тропарь, еллинский, глас 3:

Святая равноапостольная избраннице Христова, княгине Ольго, * народ твой словесным и чистым Христовым млеком напоившая, * молися Милостивому Богу, * да прегрешений оставление * подаст душам нашим.

Кондак Ольги глас 4.

Воспоем днесь Благодетеля всех Бога, * прославльшаго в России Ольгу Богомудрую, * да молитвами ея * подаст душам нашим * грехов оставление.

Ин кондак, глас 4:

Явися днесь благодать всех Бога, * прославльши в Руси Ольгу Богомудрую, * молитвами ея, Господи, * людем подаждь * грехов оставление.

Прокимен, глас 8: Во всю землю изыде вешание их * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Апостол: Деяний святых апостол, зачало 39, стихи 1–4.

Во дни оны, Павел и Сила прешедша Амфиполь и Аполлонию, внидоша в Солунь, идеже бе сонмище Иудейское. По обычаю же своему Павел вниде к ним и по субботы три стязашеся с ними от Писаний, сказуя и предлагая им, яко Христу подобаше пострадати и воскреснути от мертвых, и яко Сей Иисус, Егоже аз проповедаю вам, есть Христос. И нецыи от них вероваша и приложишася к Павлу и Силе, от честивых Еллин множество много и от жен благородных не мало.

Аллилуия, глас 1: Исповедят Небеса чудеса Твоя, Господи, ибо истину Твою в Церкви святых.

Стих: Бог прославляемь в совете святых.

Евангелие от Луки, зачало 33.

Во время оно, моляше Иисуса некий от фарисей, дабы ял с ним, и вшед в дом фарисеов, возлеже. И се, жена во граде, яже бе грешница, и уведевши, яко возлежит во храмине фарисеове, принесши алавастр мира, и ставши при ногу Его создади, плачущися, начат умывати нозе Его слезами, и власы главы своя отираше, и облобызаше нозе Его, и мазаше миром. Видев же фарисей воззавый Его, рече в себе, глаголя: Сей аще бы был пророк, ведел бы, кто и какова жена прикасается Ему, яко грешница есть. И отвещав Иисус рече к нему: Симоне, имам ти нечто рещи. Он же рече: Учителю, рцы. Иисус же рече: два должника беста заимодавцу некоему, един бе должен пятисот динарий, другой же пятидесять. Не имущема же има воздати, обама отда. Который убо ею, рцы, паче возлюбит его? Отвещав же Симон рече: мною, яко емуже вящше отда. Он же рече ему: право судил еси. И обраться к жене, Симонову рече: видиши ли сию жену? Внидох в дом твой, воды на нозе Мои не дал еси, сия же слезами облия Ми нозе и власы главы своя отре. Лобзания Ми не дал еси, сия же, отнелиже внидох, не преста облобызаючи Ми нозе. Маслом главы Моея не помазал еси, сия же миром помаза Ми нозе. Егоже ради, глаголю ти, отпущаются греси ея мнози, яко возлюби много, а емуже мало оставляется, меньше любит. Рече же ей: отпущаются тебе греси. И начаша возлежащии с Ним глаголати в себе: кто Сей есть, иже и грехи отпущает? Рече же к жене: вера твоя спасе тя, иди в мире.

Причастен: Никтоже может прийти ко Мне, аще не Отец, пославый Мя, привлечет его, рече Господь.

Молитва первая

О святая равноапостольная великая княгине Ольго, первоугоднице Российской, теплая о нас пред Богом ходатаице и молитвеннице! К тебе прибегаем с верою и молимся с любовию: буди нам во всем ко благу помощница и споспешница и, якоже во временней жизни тщалася еси просветити праотцы наша светом святых веры и наставити я творити волю Господню, тако и ныне, в Небесней пребывающаи светлости, благоприятными твоими к Богу молитвами вспомошествуй нам в просвещении ума и сердца нашего светом Евангелия Христова, да преспеваем в вере, благочестии и любви Христове. В нищете и скорби сущия утеша, бедствующим подаждь руку помощи, обидимыя и напастуемыя заступи, заблуждшия от правых веры и ересьми ослепленныя вразуми и испроси нам у Всещедрого Бога вся благая и полезная жизни временней и вечней, да, тако благоугодне зде поживше, сподобимся наследия благ вечных в безконечном Царствии Христа Бога нашего, Ему же со Отцем и Святым Духом подобает всякая слава, честь и поклонение всегда, ныне, и присно, и во веки веков. Аминь.

Молитва вторая

О великая угоднице Божия, богоизбранная и богопрославленная, равноапостольная великая княгине Ольго! Ты отринула еси зловерие и нечестие языческое, уверовала еси во Единого Истинного Триипостасного Бога, и восприяла еси святое Крещение, и положила еси начало просвещению земли Российской светом веры и благочестия. Ты еси духовная родоначальница наша, ты по Христе Спасителе нашем первая виновница просвещения и спасения рода нашего. Ты еси теплая молитвенница и ходатаица о отечестве Всероссийском, воинстве и всех людех. Сего ради смиренно молим тя: призри на немощи наша и умоли Премилосердаго Царя Небесного, да не прогневется на ны зело, яко по немощем нашим по вся дни согрешаем, да не погубит нас со беззаконными нашими, но да помилует и спасет нас по милости Своей, да всадит в сердца наша спасительный страх Свой, да просветит Своею благодатию ум наш, во еже разумети нам пути Господни, оставити стези нечестия и заблуждений, тщатися же во стезях спасения и истины, неуклоннаго исполнения заповедей Божиих и уставов Святых Церкви. Моли, блаженная Ольго, Человеколюбца Бога, да пробавит нам великую милость Свою, да избавит нас от нашествия иноплемennых, от внутренних нестроений, мятежей и раздоров, от глада, смертоносных болезней и от всякаго зла, да подаст нам благорастворение воздуха и плодоносие земли, да сохранит страну нашу от всех козней и навет вражиих, да соблюдет в судиях и правителях правду и милость, да даст пастырем ревность о спасении пасомых, всем же людем споспешение, о еже усердно службы своя исправляти, любовь между собою и единомыслие имети, на благо отечества и Святых Церкви верне подвизатися, да возсияет свет спасительных веры в стране нашей во всех концех ея, да обратятся к вере неверующии, да упразднятся вся ереси и расколы. Да, тако поживше в мире на земли, сподобимся с тобою вечнаго блаженства на Небеси, хваляще и превозносяще Бога во веки веков. Аминь.